

**‘Hmopha tao ai kha ei suh u’
~ Beilôna Hlychho, Meisavaih**



Hmopha tao he ahyrai ta eima khoh kaw sai nahta pangiasa â chhih kaw nota keimo Krizyhpazy châ chhochhi ta cha **“Hmo phapa tao ai kh’ei su u’...”** tahpa ta Kalatia 6:9 na liata eima hmô. Chavâta nama pahno ha chiepha chhao ta, ai chhielie lei awpa ta biesakâ ei cha vaw chhielie hra ei. Biesakâvawna ta apachu khohpa cha hmopha tao he ai theipa a châzie za chhopasia ta, cha cha keimo krizyhpazy, zakha zakha âtahpazy chô liata aza pa-ipacha viapahchai. Sapa ta aduahpa châ pi ta, hmopha tao chhao eima pahno. Anodeikuala.... *‘eina ai dâh’* eima tah pyly tyh, a chhâpa cha hoh lei kawna chôta hmo apasai-pa-i a ru zie a lâpasia kawna a châ .

Chakhiah cha, hmopha tao he; Khazia vâta ma, eima khoh pachaih tly? pachâ tua la, athôhna tlyma, reithaina tlyma, palyupalihna tlyma, moh phana tlyma chhâta eimâ hnabeiseih typha vâta a châ. Cha dei vei, eima Khazohpa nata bieso tawhta chhao Lei byhnâ tona nata Chyhsa châta byhnâ châna a châ hleikhôta alyna miah pietuhpa a châpa vâta a châ. Khodâh chhochhi ta cha hmopha tao thei kawpa Chyhsa châ sih la, byhnâ cha rei lei, moh phanazy, reithainazy, palyupalihnazy, athôhnazy, alynazy, eima topâ chhochhi khiahta cha chatlu ta hmopha taopa cha Lei liana heta y thai khao thlyu vei! eima tah thei aw. He vâna hetana Khazohpa ta Keimozy hawhpa dyhchhie dyhru, O Pazu pachasapa, Sawzy taihta hmopha tao awpa miah â hnawpa cha a châ.

Châhrasala, thokha hluhpi ta cha hmopha tao he Krizyhpazy eima châna lâ hlâta cha khizawpa lâta saipa he eima hluh via syulyu nahta pangiasa â chhih. He vâna heta hmopha tao dâhzy chhao a vaw nano thei ta, keimo nata keimo thei vei hâh sai, Chyhsa eima baopa chhaota a mohta nata arakhapa ta bao pi ta, phiaphuh lâkâh ta hria ta, athiahri thiahrâna zie nata alie-lâna ziezy sai ta hriapazy chhao eima y hra. Chadei vei, veihlâ lyubie reisa ta pakah-paleih ta hmopha taopazy chhao y hra ei ta, hnabeiseihna miah pierih theilei awpa nahzy hnohta hâpa hmopha tao, khôkhâh dâhzy chhao a y heih hra. Chavâta hmopha tao he a ai thei ta, â khôkhâh thei hra.

A châ tlai na, keimo Krizyhpazy hrozie awpa ta cha, *“Hmo pha tao awpa ta Krista Zisu liana chata taopa ta Ano ku hriapa châ tlôh pi ta, cha hmopha taopa cha eima châna zie awpa ta Khazohpa ta â chhuanoh chhieliepa a châ”*(Ephesi Bo 2:10) na liata miah za chho ta, Chahawhta, keimo chhao ta hmopha tao awpa ta khatino raita hoh chhielie awpa he a byuh tahna a châ hra. Chahawh hrana chata hmopha tao chhao he hnabeiseihna y tlôh leipa nata pasiana ahla leipa ta eima tao khiahta cha hraoleipa deita a châ thei. Chavâta hmopha taona kyh liata hnabeiseihna dopa a y thei n’awpa ta Chyhsa zydua hnohta nata Krizyhpazy chhôkhazy hnoh chhochhi ta tao via pachaih awpa ta miah â hnawpa cha a châ.

“Khazohpa china chôta sy”

~ *S. Candy Enawsa*



Ei palôh liata thi thai tyh hra leipa, Marapa sawzy eima chi nata pho nata ngiapâna liata hmah eima sie lymâ n'awpa châta ei pachâ tyh hrapa cha, eima râh liata tahmâ cha Khazohpa ngiachhiena vâta châ thaipa hluhpizy vaw y ha bâ hra pi ta, he nahzy heta palôh hnei kawpa ta chi nata pho hmahsiena awpa ta Khazohpa china chôta pachâna paso kawpa hmâna chôta he hawhna heta hmah vaw la hapa châ ei sala hmah thata eima sie nahta ei pangiasa.

Eima chheipâh ta liata Tlaikao nah y ei ta, ama chi nata pho ama pabohsana dâh nata ngiapâna liata hmah ama sie chatliena dâh ei pachâ nahta ei palôh ta khazia vâta hmahsie chatliepa ma a châ? Tahpa ta hiahhrina za tao na ta ei palôh pyly ta achhy na ta, hmah ama sie chatliena chhâpa ta ei za pahno hrapa sâkha cha, Khazohpa china hmeiseihpa hneipa ta châbu phapa hluhpi, khizaw chyhsa moh alâluahpazy ta ama ropa hluhpi ama palie tyhpa he a châpa ta ei pahno. He hawhna heta Marapa sawzy chhao heta châbu phapa khizaw chyhsa thaina nata ngiapâna liata moh alâluah kawpazy ta châbu ama ropazy he palie hluh sih la la, Mara sawzy ta chi hro reihta reih ngâkawpa hlâta la eima reih ta reih awpa cha vaw khoh via pi ta, ngiapâtuhpazy nata athaipazy ta Khazohpa china chôta ama ropa châ eima vaw reih hluh via khiata cha Khazohpa ta novâhna thiehpazy maniah pie ta, chi nata pho châa nata ngiapâna liata hmahsiena awpa châta pachâphapazy nata Khazohpa china, chi nata pho kyhpachânazy vaw hnei pi ta, eima râh cha thata hmah a vaw sie'pa ta ei pangiasa.

Chavâta Mara saw châ thaipazy palôh hnei kawpa ta Khazohpa china chôta châbu phapa hluhpizy he palie lymâsuh vy.

ABeipa châta chyhsa rônahpazy thâtih

~ *Rev. C. Thalai*



Spurgeon zy, D.L. Moody zy, Billy Graham zy he ama hawsaih no tawhta ama nô nawhzy ta Khazohpa bie, thlahpa lâ sâhpiti ama vaw mohôhpa nata palaiseihsapazy ama châ.

Chavâta Khazohpa bie cha ama thlahpa pati châta ama vaw nie hawpa a châ. Atahmâ Bible bie tawhta eima nahthlie tua aw.

“Hawsaih a pih thiehpazy hawhta Thlahpa lâ sâhpiti, khâpa hmah ahlah leipa cha vâ teh u, chaliana chata pachhana tlohna taihta nama laiseih thei n’awpa ta” (1 Pity 2:2) he bie he ama thisaih liata ama vaw laiseihkhei hawpa a châ

D.L. Moody cha my chareih ta dawh 4 ta thyu ta, dawh 1 chhôn Bible rei n’awpa ta a daihti a hmâh tua chai tyh tahpa a châ. Spurgeon cha Bible ei 100 a reih papuapa châ ta, ei zakha a reih papuapa cha, *“A thiehpah hawh sai ta ei nie tyh”* tahpa ta a reih. Richard Wurmbbrand ta he hawhta bie rônah ngaitapa a reih hra. *“Krizyhpah châ na ta, chakaotuhpa chhao châ na ta atah tlôh ta, rietheina, rairuna atyh beih leipa chyhsa cha chyhsa vâdua chaipa nata ngiachhi achhi chaipa ama châ”* a tah.

Abraham Lincoln ta he hawhta a reih, *“Ei daihti he thlahchhâna nata Bible reina hetana ei hmâh”* tahpa ta a reih. *“Bible he hmo zydua liata a pha chaipa nata a sôh chaipa a châ”* tahpa ta bie rônah ngaitapa a reih hra.

Spurgeon cha thlah a chhâ hluhpa nata Bible a reih hluh kawpa a châpa vâta he hawhta ama hiahhri, *“Pâpuh, thlahchhâ ma a peimawh via ma, Bible reih hluhpa he maw?”* tahpa. *“A vâ liata Pavaw azaw ngâpa khi a mathlaw chachâh lâtahpa ma a peimawh via ma, a chavei lâtahpa mathlaw maw?”* tahpa ta âchhy ei.

Bible hmotaotiezie : England beinô Elizabeth ta he hawhta a reih, *“ England rônahna chhâpa cha Bible he a châ”* a tah.

America President miasarina Andrew Johnson chhao ta he hawhta a reih hra, *“Bible he eima râh âpahniehna lôpanô a châ. Chadei chhao châ leipa ta, Bible he America chhopasiana châ ta, State to liata bie ahneituh chaipa a châ”* a tah. Chavâta ama Tâkâ lia chhaota he hawhta ama roh. *“Khazohpa liata eimâ ngiapâna eima pahnieh”* (In God We Trust) tahpa ta.

Bible cha thatlôna bieparu a châ : Zawsua 1:8 *“ He ryhpa châbu heta na pakah cha puasai chachei khah se. Cha bie zydua cha khâchâ na zyh thei n’awpa ta chhôn nata zâta na pachâ awpa a châ. Chatanachata na lâpizy cha patlâ lymâ aw ta, thlaochhipa ta na y aw”* tahpa biepiepa a châ.

Zawsua chata he hawhta bie rônah ngaitapa a vaw reih. *“Keima nata ei chhônkhazy ta cha Abeipa eima chakao aw”* tahpa ta. He bie heta chhônhto maniah a pahao kawpa a châ. Nâma chhao he *“Eima chhônkha ta Abeipa eima chakao aw”* na tah thei hr’aw ma ? Zawsua 24:15

Khazohpa bie hmotaotiezie : Hebrai 4:12 Khazohpa bie he hroh ta, hmotaotie ta, zaozi koh nata hâh atiah raihriepa hlâchhao ta tiah ta, hrona nata thlahpa ru nata lathli pachhail theina taihta chhôn thei ta, pathipalôh liata pachâna nata â chhuahpazy he thlai a pahno thei tahpa ta Bible ta miah a chho.

Zeremia 5:14 bie eima nahthlie heih tua aw. Abeipa pheisaihzy Khazohpa chata Zeremia hnohta he hawhta bie a vaw tlô khei, *“Na pakah liata ei biezy cha mei ta pachâsa aw na ta, he chyhsa zawpizy he tho ta, chatawhcha a kê khai aw”* tahpa ta.

Aizawl liata Khazohpa bie ei chu no ta Pastor Liangkhaia O lâchareih tyh na ta, Maisâh su thôn hnei ta, ama o lâei chareina maihta Bible sai ta vaw reih ngâthlâh ha tyh ta. *“Pâpuh, nama o lâei vyna maihta Bible sai na reih ngâthlâh tyh”* tah na ta, he hawhta einâ chhy. *“Khazohpa nata eimâ pakyh ngâkaw. Bible chhôn liana heta Khazohpa palôhrupa a y khai haw”* tahpa ta einâ chhy. Pastor Liangkhaia ta Khazohpa bie a pasôzie nata a papeimawhsana zie ei hmô tawhta keima tlai chhao Khazohpa bie sôhzie nata a peimawhna zie thata eina pahnosa.

Mawsi biehrwhpiepa ala nota hmo y zie : Mawsi cha biehrwhpiepa Alana einona liana khata noh 40 nata zâ 40 y ta, cha chhôn liana cha pati rai nie leipa ta, ti chhao doh hra vei. Chatawhcha alô phiazy liana chata biehraina biehrwhpiepa cha roh hra ta, Mawsi cha alô phiapa miano cha a ku ta chabapa ta Sinai tlâh tawhta za chô ta, a hmia cha a vaw khaih haw tahpa a pahno leipa ta, Arawna nata Izarel pathla zydua ta Mawsi ama moh nahta a hmia vo cha vaw khaih ta, ahnia ngâh leipa ei ta” tahpa ta Bible ta maniah a chho.(Exodus 34 : 29-35)

Mawsi hmia a khaihna yzie cha noh 40 nata zâ40 Khazohpa nata amâ kao khoh hawpa vâta Khazohpa palôhrupa hawhta pathaihna palôhrupa a hnei haw hrapa a châ. Vâmo amâ zâ luahna maih liata alei chyhsa tam oh ngâh tyh veih ei, ama moh ngâh leina chhâpa cha ama pathaihpa vâta a châ. Vâmo azâ luahna Bible liata ahluhpi hmô'pa a y. Cha zydua liata sâkha dei ei vaw palâsa aw. Mietaku vaihtuh penawh thâtih a châ aw.

Abeipa Vâlyuhchâpa cha ama hnohta avaw luah ta, Abeipa rônahna ta ama chheipâh za khaih haw ta, chavâta chi ngaita ei ta, Vâlyuhchâpa chata ama hnohta, “Chi khah ula, nahthlie teh u, moto châta thâihpha lychhieh ngaitapa ei cha vaw tlô kheipa ei hih” (Luka 2:9,10)

Khizaw lei chhiesana râh nata pachârôhna râh puasai awpa ta vârah Jubilee dawh cha nâma nata keima châta a paro haw.

Haleluia ! Abeipa Khazohpa cha chhâzaw nata chhâzaw ta reithaipa ta y mawh sy, Amen.

“ECM KTP Pakhyi ei 62-na kha la”

~ *Beirâhnia Hlychho, Theivâ*

Di (December) 2016 tawhta eipaw ‘KHAZOHPA’ lâ liata Mara saw chi chyhnawhpa, eima moleina pachâpa ta viari thôpa châ sala, movi hlâta leidia khai awpa eima châpa tawhtapa PABOHPA awpa nata ataopathina daihti phapa pie chy awpa ta ahaw lymâa chôta, KTP Pakhyi ei 62-na Tisi khih lia ahlao hra awpa ta apachhuahpanoh pi ta, Pakhyi lia heta ABEIPA china nata akhopa hawhta hroh ta, ano liata eimâ panawh (Surrender) khai tlai ma? Tahpa nata eima chi nata pho reih âboh tlai ma? Tahpa palôhrupa liata âhiahhri lymâna chôta 19th Nawh, 2017 tahpa cha thyutliapazy châta athu tu ha khiahma ? eima pahnie tlaima? Tahpa pachâna chôta eima o tlô n’awpa su lâ pangai pi ta.

Eima pakhyi ahmâ n’awpa o pipa N. Chياهو Byureih (Pandal) pha ta, o hmia liata Tisao tlapa ary lih liata Ngalo âkhiekhâ ngâkawpa khala apiry hmeiseih. Nothlah âla khoh kawpazy châta apakhyna daihti my tlamaw n’awpa anao kaw. Amâ chhuanohna zydua chhao apha ngâsâ. Nie nata baw abusaipa liata maniah ama patipavy kaw hra. Laitlâ lâ pua sih la vaosa apôhpa ta sôpangawh phapa a châ aw tahpa âhno thlâh hapa âpathliah hólô ei ta, pachôh liata chhao âpachawh thlâh pyly ta, khichhaipa châta cha thapawh âchhieh hmeiseih. Hmoto he âsu pahliepahlaw khaipa ta eima pahno, a thlihuah anai zualua kaw cha maw! Ti deikua asôh daihmâ. Hmo ngiatlâh a châ kawpa avaw lâpa cha ‘Right to quality’ ama tah tlyma? He he khichhai raina kyh liata hmâhpado kawna y ta, atlôtuapa maih kha Byureih (Pandal) âhniapa nata o pha lyuphapa chhao pathlua leipa ta ama patlôsa lymâpa kha a châ. Aly’pa a châ hmeiseih. Kha hlâzy kha cha Byureih âhnia viapa nata o pha viapa lia maihta chyhsa ano âtah viapa tlyma, Siaha khichhôn Local, Branch zy, Siaha liazy chhao ta hmiamo ahnei viapazy kha phie patlôsa khai tyhpa kha a châ. Thotlâh nata Siaha khichhôn ahnai viapa châta la dawh parona pyu thei khao leina lâ ochaki chabâpa kha eima tovyuh a châ tyh. Tisi khih lia deikua la hla liata ‘Atlâh pathaihpa liata apasasana rai y khao aw vei’ tahpa hawhna khata o tlô raina liata hmiamo chôkiana y leipa hawhta a châ

Daihti cha hmâh pathaopa châ ta, maniah achhituh penawhzy achupeih kaw ei ta, hla lâta achhituh penawh apiepasa ngâsâ ei ta, aviapachaipa ta hla maniah areipatuhpâ kha reithai âchhieh hmeiseih. Anodeikua la eima tah heih aw; he bie hmâh awpa abyuh tyh cha maw, Chi nata pho reihkah kyhpachâtuhpazy châta la palôhpasana dei a châ. Mara reih he Marapa chizy pi heta Awnanopa apôhpakhyna lai viapa lia maihta eima hmâh hluchai awpa châ vei mâ Awnanopa kyh liata la chi nata pho reihkah angiah vei, a leidia hapa chhao ta pei

bao vei eima tah mâ Chata a châ khiah cha khâzia eima Biehraia nata Hlabu pachhâsapa ta Mizo (Lushai) reih heta tloa eimâ chhitha thlâh vei? Eimâ raoh via n'awpa a châ khiah cha tah tlamaw n'awpa a nao kaw. Mohtlei a châpa Puhpa J. Vialua 'L' thâgiahna apasa kaw cha maw!

Keimo ECM pi kha Delicate khiah ma eima châ ha? Tahpa a nao kaw hra. Khazohpa ta R.A. Lorrain (Vailimahpaw) hmâa ta eima reihkah eihhrâhpa âhhihtha lymâ awpa nata eima reihkah hmâpa ta Khazohpa ano chakao reithai awpa kha maniah pasai/pie ha tlôh ta, Awnanopa lia chhao he reih pabohsa awpa he atheithlâh hra vei mâ ? Delicate hluhpi hnei ha pi ta a pha kaw, châhrasala ama reih kha âchhihthana châta eima hmâh awpa châ vei.

Ama pahno awpa byuhpa chi deikua la eima hmâ awpa a châ. English pa chhao châ ei sala, English eima hmâpa thlâh ha awpa a châ hra. Atahmâ nota eima Awnanopa apôhzihna lai viapa (Local rei leipa ta) liata achhihthana châta Mara reih nata Mizo reih eima hmâna dâh ta la Mara reih 55%, Mizo reih 45% rachhôn ta â lâ. Heta he la a châ awpa châ vei. 90% he Mara reih eima hmâh awpa tloa châ vei mâ ? Reih hropa he ahao ma pi, reih no ta daihti hmâhpakaohpa daihti rai raina a reitu haw.

Ryureina liata ryureihtuhpazy kha eima chahnaochakhi khiahma? tah thei'pa a châ. Awnanopa lâhmo a châ hapa vâa hiehâhpa nata reihkah chahrâhpa hmâpa angia vei, tahpa palôhrupa a ypa vâta âchadopa eima châ khai tahpa âhnothlâh ha. Ryureih awpa ta atlôpa eima châna hawhta reihpahmaohna he ahluk hra awpa a châ hra. Ryureina sâh chaipa he bie pachiapazy panano theina daihti phapa nata rypaoh chaina daihti tloa a châ

Hlapy atlôpa hluhpi ta eima hla paryhpa/sapa lia deikua la, a hluh via syulyu kha la thlahpa maniah a pahlao tu leipa a lyu kaw; hroh tu tlâ vei. A chhâpa ta âlâpa cha a siana nata a khihnarâh tua tua leipa pi ta; keimo mohphana, khi lâna nata ângiana tloa eima tua tua khiahma tah thei awpa a châ. Eima (culture) hmâpa ta Khazohpa reithaipa he a phaleina a y lei tarawpa ta, eima hmâna dâh deikua la a huasua tupâ ha khiah maw? MTP ta tao awpa ta tloa âhmie viapa ta âlâ. Daihti pachhâna lâ chhochhi khala, khizawpa lâ liata music concert piry kawpa aza lyu kaw bâ. Eima pastor zy nata thlahpa lâ liata eima nôpawpa penawh palôh hmeiseih kawpa ta a mâ hlao thei vâma i...!?, tahpa chhao pachâ khi a châ kawpa ta â lâ. Ano a chhytuhpa ta palôh hmeiseihna chôta â chhy awpa ta ropa châ tlôh ta.

Awnanopa a pôhzihna laipa (local zudua liata châ leipa ta) lia maih he cha Mara reih he hmâh hluh chaipa châ sala, khizaw hneirôna sôh nata piah he âchhy (apahniesa) leipa ei sih la, Khazohpa pathaihpa he âchhy ta; a khopa tao awpa he eima châ. Chi nata pho eihhrâhpa tua papuapa nata pabohsapa eima châna he khâ pasô ta, reih pabohsa ta, hmâ hluh awpa eima châ tahpa pachâ lymâ na chôta 23th Nawh, 2017 noh ta Tisi khih eima puasai haw.

Editorial

Khazohpa ngiachhiena nata chhithana zawhzi ta Hla nata Bie chhao siepazao thei lymâ ta aly'pa a châ ngaita kaw. He hla nata Bie he Marapa sawzy pi ta eima pasô vei khihta cha pho hropazy ta maniah pasôpa leip'aw ei ta, Mara reih ta thlachareih a puapa, a y chhônha a châpa vâta Mara zawpizy ta cha khâeima pasô lyhlia awpa a pha.

Daihti khachâ rakha ma a chôkyh (Cover) chhao vaw colour thei leipa pi ta, atahmâ May (Patôh) Issue tawhta colour ta eima vaw papua theipa chhao he Khazohpa nata nâmo khopasana nata deichhyna hleikhô ta Puhpa N. Zakhai, EM(Edn) & Chairman BML nata Puhpa K. Vanlalliana, DCEO & Secretary BML zy hriapasana nata âpiepasaihna vâta tah lei thei awpa châ vei. BML hmahsiena n'awpa nata Hla nata Bie châta amâ piepasana he a rônah hmeiseih.

Pho rônah viapa nata aso viapa maih ta ama reih pasô ei ta, a hmahsie n'awpa nata a laiseih n'awpa ta ama hriapasa tyh. Mara sawzy chhao pho so viapazy hâ alapa ta eima reih he chi nata pho abohna châta a peimawh chaipa na a châ tahpa pahnopasiana chô ta na ta, he reih a no eih tlai ta Khazohpa ta maniah a piepa zawhzi ta District Council chhao a hnei theipa eima châ tahpa athei thlâh hana chô ta reih aboh n'awpa ta ahriatuhpa nata ateituhpa châ chyu ei suh u.

Thokha he Hla nata Bie Magazine, Mara reih ta thlachareih ta apuapa a y chhôhpa chhao pasô leipa ta mopanaina zie nata la awpa akhoh leipa, Thlakha ta he thâtiibu châta Rs 20/- pie awpa a ngiaroh kawpa eima hlüh kaw chypazy he a pei ngaita kaw. Pakhâta ta pachâpasia ei suh u.

Khazohpa ta Mara reih maniah pie ta, Mara reih vâta District Council hmô thei pi ta, District Council vâta Sawhkhâ raihriapa ta hlaozy hnei thei pi ta, reih vâta Byhnâ eima daopazy athei thlâh hana chôta Mara reih abohna châta eima zydua ta tei lyhliia ei suh u.

**“Hy Marapa Thyula
vaw nahthlie teh”**

~ H.C. Lal mama

1. Hy Marapa thyu la vaw mahthlie teh,
Chi nah reih he Beipa ta maniah pie ta apaduapa eima cha;
Pabohsa ta palaiseihsa awpa he akhona zie nata âchhuahpa a châ,
Eima chi nah reih hawh chyu ta Bei hmia lia aduah tlôh aw pi.
2. Hy Marapa thyu na chai asaih tyh,
Chi nah reih abohna châta thaina sona lia arâpasua ei suh vy;
Tahmâ he eima ti nah rân ta maniah a aw hai,
Tiama ngâchhieh dona chôta pheiliah haih chyu suh vy.
3. Hy Marapa thyu la aheih la moh tyh,
Tiama riethei tao lyhliana leipa ta hlaotlohna y vei;
Nâ chhuahna nah ryhraona cha Abeipa lia pavaosa la,
Na hmotaona lia tlokhuh ta tao la, hlaotlohna na hmô aw.

“Rakhô”

*Hriapasapazy châta sapa tlâhna,
Tlâh leipazy châta tlâhna;
Thathipazy tlaichhai chaipa,
Chhôhso pasapazy raithlih lona nah,
Yru lôhlie taona su,
Kyhpachâzy kyh amâ pachâna.*

*Thihpazy thlalôh ta amâ ziana,
Aw... Khôpheih, na sôna he;
Zasâh manôhzy ta uasa veih ei,
Thathipa lôhhrâtlôna châ chi ta,*

*Hriapasapa hu pahnosatuhpa nba vaw châ,
 Chho thaipa ta reih thai vana,
 Lei chyhsa châta na phana he,
 Aw Rakhô !!! Aw Rakhô !!!*

***Na râh châta khâpa e
 na tao hra aw?
 ~ L. Beimokhai***

Ei sai tyh ei pihna râh hi,
 Khohleikhonazy ta a bie khai haw;
 A pawngianazy chhao lo laih ei,
 Ahy paduapathi aw.

***Na thaina, sona, na hneina zydua nah,
 Na thyutliana daihti lia;
 Na râh châta khâpa e na tao hra aw?
 Chi hro, pho hropa nah râh hropa,
 Sei liata atâh awpa ta la,
 Pasaih vana ei pihna Maraland hi.***

Hlâno manô mapaw hrongiapa khawh,
 Veiseih palôhhâpazy yna su;
 Ngâchhih, ado, pasaipha laihna,
 Ahy paduapathi aw?

1. N. Leipo
2. Laizai
3. V. Lalchhawna
4. L. Vethang
5. K. Chialo
6. Maki
7. Eric Nolua
8. N. Ngôthlua
9. L. Patha

H	G	N	A	H	T	A	Z	G	N	A	M	K	U
R	H	K	H	D	A	G	N	I	M	H	L	A	L
O	J	L	G	F	I	N	A	I	L	P	A	S	A
H	H	J	G	S	Z	A	X	V	B	N	M	A	L
N	S	H	X	Z	X	I	V	M	H	F	C	L	L
U	P	L	C	F	I	K	V	B	M	J	D	J	I
N	A	A	X	Y	E	A	A	O	D	S	C	H	A
A	U	N	F	E	L	S	H	G	M	J	X	D	N
A	K	X	D	V	I	H	B	K	G	H	F	S	A
Q	A	W	A	S	A	Z	I	C	A	D	A	F	G
J	K	N	V	X	P	S	A	A	A	P	S	V	J
R	T	Y	U	G	S	J	K	H	L	L	L	F	T
A	S	D	F	H	J	K	R	D	J	Y	Y	K	R
A	S	D	F	D	O	M	H	O	R	F	M	M	W
R	I	D	N	A	V	A	N	A	I	L	P	A	S
F	Z	Z	S	F	X	C	B	N	M	E	S	F	D
Z	H	A	Z	N	I	H	C	A	M	I	K	O	R

--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--

1. Editorial	2		
2. Interview with J. Vialua (L)	~ CTS. Hlychho	3	
3. ECM KTP Pakhyipi ei 62-na kha la	~ Beirâhnia Hlychho	7	
4. DCEO tawhta pahnosana		10	
5. Mara reih rozie taopathi thai a châ khao aw tlyma	~ Lai u Fachhai		11
6. Hy Marapa thyula vaw nahthlie the	~ HC. Lalmama	14	
7. Hriena vâta raihriana su pasiepa	~ HC. Malsawmthanga		15
8. Mararâh he âboh ma	~ Z. Vabeipikhai		18
9. Rakhô	~ Judson KT. Zephatha	22	
10. Khazohpa china chôta sy	~ S. Candy Enawsa	23	
11. Nama ochhôh liata khâpa reih nama hmâh tly?	~ J.B. Khaisia		24
12. Na râh châta khâpa e na tao hra aw?	~ L. Beimokhai		26
13. Abeipa châta chyhsa rônahpazy thâtih	~ Rev. C. Thalai		27
14. Hmopha tao	~ Beilôna Hlychho	30	

Interview with J. Vialua (L)

~ CTS. Hlychho

(Interview noh nata dawh pahno pasia thei khao leipa châ ta, Nozuah Vol –III, October 1997 copy tawhta a interview tuhpa Pihnô CTS. Hlychho pasaina la khaipa ta, chyhsa hluh via ta eima reih thei n’awpa ta tahmâ vaw papua theipa eima châ. Pihnô CTS Hlychho chô liata eimâ ly hmeiseih. Ed)

Mararâh liata Hla bie, ao nata reih ta Mararâh acheihchalotuh chaipa, chi hropazy ta a ao ama nahthlie/thei châhta, “Ahy rai maw? A thai dâh châ” tahpa ta miah ama uahva chaipa Mr. J. Vialua, Artist nata CTS. Hlychho, Cir.Manager hiahhrina nata achhynazy vaw reih hra tua rai, he hawhpa chyhsa Marapa sawzy ta eima hnei theipa he vâhnei âchhih hmeiseih.

Note : Mydi 7:00 A.M pa ta ochhi va chakhyh na ta, Vaw charei tua’ tahpa achhyna ao ei thei nahta angia na ta. (CTS =Mrs. CTS. Hlychho, J.V.L = J. Vialua)

J.V.L : E! vaw charei tua ! A vaw tyuh tua tyh, atamy cha dia pangiasa leipa tan a hmia ei vaw hmô !

CTS : E! Na thâtih sia viapa ta pahno koh na ta atamy cha ei vaw charei laih he zaw ! Daihti ruapa eina pie thei chi ma?

J.V.L : Ei thâtihzy na pahnopasia koh khiakta cha daihti ruapa cha ei cha pie lei cha tlyma, thopizy doh khai tua sih la.(Thopi thlai pataosa ta)

CTS : Khati kô ta a pihipa ma na châ tly? Na nô nata paw moh eina chho thei chi ma?

J.V.L : Kô 1954, 19th March, Tuesday My dawh 9:00 Am ta a pihipa ei châ Ei pâ moh cha J. Hraikhei châ ta, ei nâ moh cha HC. Ngôcheih a châ. Ei nâ he Thiahra Amôbyuh Bei sawchanônô a châ.

CTS : Chakhiahla he tlupo ta hla nata bie na thaipa he achuna na hnei tlâ ma? Kô khazie na châ tawhta ma Hla he na pahâh pathao?

J.V.L : Achuna hnei hlei vana. Anodeikua kô 1961 – 63 liana kha Radio he nahthlie awpa ta pua tyh na ta, Radio a hneituhpa nah ochhôh cha a nahthlietuhpa ta bie khai tyh ei ta.

Ochhôn chhao to pha leipa pi ta, o chahrih tawhta ei nahthlie tyh. O chahrih lia liahsa buarâ aphaw pi ta, Radio ama pasasa chhôn zydua cha palôh tlâh ngâsâpa ta ei nahthlie tyh. He tawh heta Hla he ei pahâh pathao tlâ ei tah aw.

CTS : Kô khazie nap ha tawhta ma hla he na sa pathao?

J.V.L : Kô 1972 liata zawpi hmiakô eikha ei sa tua chai.

CTS : Khiahla hla na phipa he ahluk kaw bâ nah ta pangiasa na ta, hla khazie ma na phi bâ tly? Khâpa hla na phi tua chai?

J.V.L : Ei hla phipa zydua he rohpakhy ngâchy na ta, Hla 100 hlei châ ta, ei phi tua chaipa deikuala “ *Di hro rai vâ vana* ” tahpa châ ta, kô 15 ei châ nota ei phipa a châ.

CTS : Na hla phipa hry liata khâpa hla ma na khoh chaipa a châ?

J.V.L : ‘Khazia mohtlei eina châ sai chi’ tahpa hla he ei khoh chaipa a châ. Achhâpa na pahno thai thlâh nahta ei pangiasa. (Pahneih ta) a bie tawhta pachâ la hla he ei palôh nâ hria tu hapa vâta, a roh chhao roh hlei leipa ta Totâ ala na ta tlâ ei phipa, ei sapâ lymâ.

CTS : E! na palôh cha pasasatuhpa ama y naw ! Chakhiahla Hlasa nâ vaw thao tua nota na viasa ahyzy ma ama châ?

J.V.L : Ei viasa/ ei Group lâhpazy cha :- K. Bialua, K. Chiama, N. Chakhai, A. Zyusa zy ama châ.

CTS : He liata na viasa parohpazy he atahmâ ama hroh khai ma?

J.V.L : He eima viasa hry liata A. Zyusa deikua cha kô 1974, 10th April liata miah âpahâsai haw. Viasa hropazy deikua ama hroh khai. Officers nata MDC zy ama châ.

CTS : A pei ngâsâ! A. Zyusa moh atahmâ taihta Mara sawzy heta reih tyh ei ta, kei chhao amoh ei thei hluh kaw. Aw hr’ei sih la vaw kua thai’pa châ khao tlôh va! Chakhiahla hnôhlâ daihti na pachâ châhta na palôhzy âlie tyh ma?

J.V.L : Ei reipa heta la chhupasiasa khai thai’pa chhao châ vei. Ei palôh âlie hleikhô tawhta ei mothlaw liata a châh ngâhlâh ha. Palôhliena nâ pietuh chaipa cha hnôhlâdaihtizy ei thei châhta, taozie thai a ru tah na ta, chôthlahpinô khaih phana ry lia chhochhi cha taozie thai a ru via heih.

CTS : Chakhiahla hla he sa lymâ awpa nâ chhuah ma?

J.V.L : Kô 1972 June thla liana khata Puhpa J. Pathy o liata ei viasazy hmiakô liata kô 50 taih hlâsa awpa ta ei vaw taih chiehpâ châ ta, atahmâ he kô 7 ei hnei bâ he zaw!

CTS : E! atlâhpa ta eima y khiah cha kôzy cha thlai pua tyh pi ta, tlâhna he apahawh tua sih la, a tlâhpa tan a y lymâ khiah cha, kô 50 khô lâ chhao tlâ na sa lymâ tlai maw! Na ao nah reihzy he Khazohpa ta byhnâcha pie lymâ sala, kô 60 hlei chhao ta machâ hlei bao va chi. (Athata pahneih ei ta) Chyhsa matawpa chi he cha machâ thai v’ei ama tah vei mâ

CTS : Chakhiahla Cassete tao via awpazy achhuahna na hnei ma?

J.V.L : A! Cassete tao awpa he hneinazy abyuh vâta tao via awpa cha ei khopa châ ta, atahmâ cha eima kôzy vaw hluh laih ta, chavâta tao via thei sala tahpa ei khoh kaw. Hâi viazy châ sih la châ sih la Cassete tao hluh he achhuah hlei vana.

CTS : Tlai na ! Na kôzy uhthei ha bâ ta Mara saw liata âlâchaipa châ chi ta, kei chhao ei khoh dâh ta cha tao via thei la ei cha khokhei kaw. Hmialâ daihti he khâma eimâ tyh aw pahno thai’pa châ tlôh leipa ta.

J.V.L : Â! Tlâhna he apahawh tua chai sih la e.

CTS : Hlasana liata lymâ na dao tlâ ma?

J.V.L : Kô 1976, Chhimituipui Dist. Beat Contest liata Best Singer tan â tlyh ei ta, kô 1976 December 13th liata Mizoram State Level Beat Contest liata Best Vocalist ta atlyhpa ei châ hra. Kô 1991 Sept liata Siaha liata Solo & Beat Contest liata sâkhana ei la heih.

CTS : Hla ahipasuana lia zaw?

J.V.L : Hla ahipasuana lia he eikha ngâh phi na ta, MADC Silver Jubilee liata sâkhana ei la hra.

CTS : Aly âhhih kaw na. Chakhiahla Politics he na pahânazie a châ ma?

J.V.L : Â! Politics he pachâ kawpa châ leipa na ta pahâh lei kawpa châ hra vana. Ahyzy tloh n’awpa nata tlohlei n’awpa tlyma achhuah ta pahâhpa châ leipa na ta, a râh leilô saw ei châ hra vâta apahâhpa chhao ei châ thei ngyu aw.

CTS : Tlaina, Mongyuh bieso ta cha, “*Na râh nata na Khazohpa athei thlâh ha tyh*” tahpa châ tlôh ta. A râh leilô sawzy pi hela eimâ phana rakha liata cha râh thapasana he eima hnei tlai he zaw!

CTS : Khiala M.CH.P he zaw khehtama na hmô dâh a châ tly ? Hmialâ tôh awpa ta ma na hmô ma? Hnôhlâasy awpa ta na pangiasa? Na hmô na dâh tlai pahno’pa ei byuh kaw.

J.V.L : Hrohsopa châ leipa na ta pahno thei vana. Anodeikua la M.CH.P namâ vaw duaupa he Py tha atlô hleikhô ta, namâ chhuahnazy he a pha, Aims & Object he Mararâh châta abyuhpa nata phahnai awpa a châ vâta Mara sawzy he thokha hluhpi he py he cheihchalopa ta backup awpa he apasaih/achhuah chyu ei ta, hmahsiena lâ nama pangai nahta ei pangiasa hmeiseih. Nama Magazine moh chhao he (NOHZUAH) châ ta, Magazine moh chhao he yzie ahnei kaw cha maw. Mara saw zydua châta Nôthlôh, opi palôh nôpih châ awpa ta ei khokhei hra. Atahmâ chhao a châ ngâhai tahpa ei hmôna dâh a châ.

CTS : Kei chhao ei tao thei chhôhpa liata M.CH.P châta nâ pasaihna eimâ ly hmeiseih.

J.V.L : Kei chhao ei châyly ngâsâ M.CH.P Tlâhparei mawh sy.

CTS : Nie pahâh sy.

J.V.L : Nâma chhao sy.

MARA REIH ROZIE **Taopathi thai a châ khao aw tlyma?**

~ *Lai u Fachhai*

“O” nata “A” luh khupa kyh liata

Mara reih he Tlô sai Mara reih zipa ta taopa châ ta, eima zydua ta he he lôraoh kawpa nata thathyu kawpa ta cheih pi ta, eima ro lymâ. Mongyuh reih liata “o” ao ta parosapa he Mara reih liata a luh khu pi ta, Tlô sai Mara reih liata “o” ao (Chapi-Ngiaphia Mara reih liata “ei” ao) he a luh khu leipa “o” ta eima hmâ. Mara reih ta biechiah (vowel) sâkha, “a” he a pachhohpa nata a pasipa a y. “A” biechiah pachhopa cha a luh khu leipa ta “a” ta sôpa châ ta, “a” pasipa liata a luh khupa ta “â” ta hmâpa a châ.

He hawhta “ô” nata “â” luh khupazy hneipa nata hmâpa he Marapazy châta cha bua vei. Computer liata chhaota a luh khuna hnei ha ta rairuna y vei. Châhrasala Marapa he keimo deita ta liapahlô liata a y thai awpa châ khao ma pi. Ama châ liata luh khupazy a hneipa khizaw chipho laipazy ama y hra nota, India ta official reih sâkha châta a hmâpa English (Mongyuh) reih liata deikua cha luh khupa vaw hnei vei. Chavâta eima mohzy (chyhsa moh, râh moh, etc) liata luh khupa a ypazy he eima official moh liata cha a khu tlâ khao vei. Pakhona ta “Nôhro” tah awpa kha “Nohro” tahpa ta ropa châ ta, “Chhaolô” tah awpa kha “Chhaolo” tahpa ta ro awpa lâta a pua haw. Palâ khih moh chhao sawhkhâ liata cha “Pala” tah awpa â ngiah haw.

Cha dei châ vei. Mongyuh reih liata “o” ao ta ama parosapa, pakhona ta, “Tokyo” hawhpazy kha, Mara reih parosazie zipa ta cha “Tôkyo” tahpa ta ro awpa châ ta, “Tôkyu” tahpa ta eima ro vei khiata cha, Mara khih sâkha “Tokua” tahpa parosazi ta “To” he parosa awpa lâta a pua haw. He heta Mara reih a cheih leipazy cha rei lei ta, Marapa châ tlôh ta, Mara reih a chu beih leipazy châta rairuna a tlôkhei. Mara reih a chu beih leipa Nochhi Marasawzy ta cha, “Thla tota hluh kô to pôh via ei” tahpa hla he, “Thla tôta hluh kô tô pôh via ei” tahpa ta sa awpa lâta a pua haw. Chyhsa hluhpi châta cha, “o” châ tlôh ta, “o” ao ta parosa leipa he pahno thai khao veih ei.

He hawhta vaw tao ha hri sih la cha a pha kaw awpa tlai. Mongyuh reih liata a parozie hawhta, “o” ao, Mara reih ta “ô” luh khupa ta eima hmâpa he, “o” luhku leipa ta tloa vaw

hmâh ha sih la, liahsa ta â thlâ ha aw. “O” luh khu leipa he, biechiah pakaohpa “ai” nata “ia” zy hawhta biechiah pakaohpa ao (combined vowel) ta tao sih la, “o” nata “e” pahlyhpa ta “oe” ta soh sih la, â thlâ kaw aw. Chatanachata “ô” luh khupa rairuna nata “o” luh khu leipa rei pado leipa buanazy eima khôkhâh thei ha aw.

Biechiah “a” pasipa nata pachhohpa kyh liata chhao, “a” pachhohpa he cha a ualua ta y sa la, “â” pasipa deikua he a luh khu châpa ta biechiah pakaohpa (combined vowel) ta soh hra sih la, “a” nata “a” pakaohpa ta “aa” ta soh sih la, “â” luh khupa rairuna nata buana a khôkhâh ha aw.

Alphabet liata biekô (consonant) sâkha baichhi awpa kyh liata

Biehnawh (alphabet) he sâkha ta papôhpa châ sa la, biekô (consonant) “J” he alphabet liata baichhipa châ la, “ch” vyuhpa ta “j” hmâh sih la, chatanachatea “chh” hmâ n’awpa liata “h” sâkha thypa ta, “ch” he “chh” ao reina châta eima hmâ thei ha aw. “Chh” hmâpa a châ nahta cha, he rohtuhpa pho, syllable mianopata liata “h” miapangawh po so awpa a byuh haw (Chhâchhaih).

Mara reih reizie aony a hnaipa châta “h” baipa kyh liata

Mara reih he aony sâthôh ahneipa (tree tonal language) châ ta, cha cha a tlâhpi ta tonic solfa liata “doh, ray, mie” aonyzy he a zi. A reizie a thlâzi via thei n’awpa ta “doh” tao liata “h” baipa a châ. He heta Mara reih reizie panaosa ta a pathlâzisa via tlai. Châhrasala “dôh” ao maih nata “dôh” ao hmeiseihpa a châ leipa, “doh” ao khophiepazy lia taihta “h” bai laih lymâpa a châ nahta cha, “h” bai n’awpa vaw hlul ngâsâ thlâh ha bâ ta, Mara châ a ngianazy a parao khai haw, pakhona ta, khihnahrâh (syllable sâthôhpa biesâ liata “h” sâpalih pyu a y), chhôhnmoh (syllable sânopata biesâta liata “h” sâpangawh pyu a y).

Chavâta ao hnaipa liata “h” bai awpa kyh liata, ao hnaipa maih ta bai khai thlâh ha leipa ta, he hawhta a tao thei sa la a pha kaw aw:

Syllable miakhapa biesâ liata cha, ao hnaipa maih ta “h” bai khai awpa. Pakhona ta, tlâh (mountain), râh (land).

Syllable miano a ypa biesâ liata cha a liah liata “h” bai hlei leipa ta, a chhâna lia ngalah ta bai awpa. Pakhona ta, “mohhoh” tah awpa byuh hlei leipa ta, “mohoh tlâ tah awpa.

“Doh” ao hmeiseih a tloh leipa, Doha o khophiepa liata cha “h” bai hlei lei awpa. Pakhona ta, “rôhnah” tah awpa byuh hlei leipa ta, “rônah” tahpa a daih ta, “hmeihseih” tah awpa byuh hlei leipa ta, “hmeiseih” tlâ tah awpa.

Syllable miathôhpa tawhta a chô lâ biesâ nata mohchho zydua cha, a liah liata nata a chhânazy liata “h” bai tlâ lei awpa. Hezy cha “h” bai leipa chhaota yzie hropa a pua awpa ama châ tlâ leipa vâta “h” bai leipa chhaota rei chhei n’awpa y thai vei. Pakhona ta, “pachhuahpanoh” tah châpa ta “pachhuapano” tah awpa, “khihnahrâh” tah châpa ta “khinarâ” tah awpa, “Khazohpa” tah châpa ta “Khazopa” tah awpa, “Krizyhpa” tah châpa ta “Krizypa” tlâ tah awpa.

Mara reih a hmâh awpazy cha Marapasawzy châ pi ta, Marapasawzy ta eima pahno thai khih cha â daih. Chavâta chi hropa Mara reih a chu awpazy pachâ tupa vâta Mara reih angiana parao awpa pha chai aw vei. Reih aony (tone) he cha a ngiana (pahnona) tao leipa chhaota, a reih a cheihpazy ta pahno thai ei ta, chi hropazy chhaota reih ama thai laih tita cha ama pahno laih thlah ha hra. Syllable miano miathôhpa tawhta a chô lâ tahpa chhochhi cha, ao hnaipa liata “h” bai leipa chhaota rei chhei n’awpa y thai khao vei. Vaili mapaw kha chi hropa châ ta, châhrasala Mara reih ao hnaipa ngiana a y leipa Mara châ a reih thai thlâh haw, Mara reih liahsa a thai hapa vâta.

He pahruana he hmâpa châ mawh sa la, Hlazy Nuhby 23-na he, a luh khupa y tlâ leipa ta, he hawhta ro ta rei theipa a châ:

1 ABEIPA ja naa waitupa jaa ta,

A phahla aw va na;

2 Si panyupa su liana ja na pabyusa tyh ta,

- Ti a jalina kiahzy liana ja einaa chi tyh;
3 Ei hroena chao he pahroepathi tyh ta,
Anoe moeh vaata siana laapizy liata einaa chi tyh.
4 Thina noepahli saikao sao hra aw sa la,
Hmoe pha leipa ji aw va na;
Naa ei hnoeta y tloh ji ta;
Na somasi nata jojahrei ta thlah eina paloh tyh.
5 Ei khakhaipazy moehmo ta
ei hmiako ta tlaakhai naa chuady tyh ji ta,
Ei luh he sathaw thu ji ta,
Ei nyu chao khopathla ngaa ta.
6 Ei hroe choh noeh zydua liana heta
Phana nata zawngiana ta eina zi laih lymaa thlyu aw;
Jatawja ABEIPA oe liata tlyaw ta ei pahraa thlah ha aw.

MARA RÂH HE Â BOH MA?

“Marapa sawzy eima râh liata eima leidia ngâkaw he zaw”

~ Z. Vabeipikhai Meisavaih



Biëpahyna: Atahmâ ta eima reih awpa he kô 2013 liata ei kha Article ta Deiva thâtihbu liata papua ha na ta. Atahmâ he a eino (2) châ ta he H & B Magazine liana heta ei vaw palâsa heih. Reih tuhpazy ta eima reina daihti liata eima palôh ta Mara râh he saina chôta eima vaw reih chyu awpa ta ei châ haw ei.

Atanoh daihti liata eima District Council he kheih ta na vaw hmô hra tly? Râh zawpi he zie via maniah ama mohôhna kyh liana heta eima palôh a tlâh khai vâ tlyma he? tahpa ei pachâ tyh.

Eima râh liata ryureina sâh chaipa, Mara zawpizy ta eimâ pahniehna chaipa Mara Autonomous District Council he Khazohpa ta eimâ pahniehna awpa ta a paduapa a châ tahpa he keima mo pakha pachâna nata ei vaw hmôna dâh a châ. Atanoh daihti liata eima District Council he pakhâta tah eima sai khiahta cha, chyhsa hluh via châta cha palôhtlâhna nata a pahniehna tlâh châpa ta alâ khao vei. Reih chi nata Pho âboh n'awpa ta eimâ pahniehna sâkha nata a su pi chaipa eima hneipa châ hra tlôh ta!

Cha hawh khiahtala, atanoh he hawhpa hnabeidychhih kawpa bie eima reih awpa a vaw byuh hapa he khazia vâta a châ aw, he hawhpazy he a hmeiseihpa ta vaw tlôhpa châ mawh sa la kheih ta Mara sawzy he eima y khao sualua va? Eima râh liata chi hro pho hropazy ta chado chadaona y leipa ta ryu maniah reih thlu ei ta, a râh zawpizy hmâchhâ cha ama sei liata atâh pi ta, 'kapi, kapu,' tahpa ta a râh hneituhpazy ta pho hropazy eimâ naoh ngâkaw bâ he zaw, he zydua he a thaby chaipa ta ei pahnopa nata ei hmôna dâh cha eima

râh, Mara saw biehneituhpazy nata ryureituhpazy heta Khazohpa palôh eima patlâh khao leipa vâta a châpa ta ei pahno! Kheihta na pachâ hra tly?

Khopathliana doleipa hmâtuha cha thailei pachâsapa a châ aw tahpa bie eima thei tyhpazy, a râh nata a siana cha tua tua ula, chatanachata he zydua he a cha baichha aw ei, tahpa biezy, ryureina dopa cha Lihpi hawhta loh mawh sy, tahpa bie eima reih tyhpa nata eima thei tyhpazy heta yzie ama hnei khaopa ta pahno va na! atanoh liata ryureina dopa eima hmâh khao lei vâta eima District Council nata a mohôh haipa Mara sawzy heta hmahsiena nata laiseihna hlâta leidiana nata seichâna lâ eima pangai lymâpa ta ei pahno!

Eima unawhpa Lai District nah he amopâtlâh ama châ kawpa ta ei pahno. Kha hlâta cha LADC nata CADC zy ta ryureina ama hneina daihti liata bietluna ama tao awpa chy maihta cha MADC bie hâ tua ei suh u, tahpa ama reipa thei tyh na ta. Atahmâ deikua cha khâsaw ta maniah reih khao leipa ei ta, keimo hmâchhâh ta eimâ zâ daoh ha bâ hih. Pachâpasia hohpa châta cha nawhtaw â chhieh hmeiseih!

Lai Autonomous District Council / Lai District liata YMA a duah thei vei ama tahpa bie ei theipa chhochhi he cha mopâtlâh ama châ kaw ei tah tyh. Chazy cha ahyzy vâ maw? eima tah khiahtala, a râh zawpizy amâ do vâ hleikhô ta LADC Area liata ryureina dopa hmâpa ta zawpizy amâ chhithapa vâta a châ thlâh haw vei mâ? District uhtheina lâ liata Aizawl, Lunglei, Siaha tahpa za châ ta, Siaha he uhtheina lâ liata sâthôhna eima châ chuh (su hrolâ la reih mâh ma pi, Lai nata Mara ngâlâh eimâ nua aw).

Hmahsiena lâ kyh liata zaw? District uhtheina lâta saipa a châ khiahta cha Mara District cha uhthei via ta, sâthôhna liata y pi ta, LAI District cha sâ sarina liata ama y. cha hawh khiahtala Mara District cha ato liata hmahsie ta a sosâh via awpa eima châ. Atanoh daihti liata Mararâh asosâhna nata hmah a sie kawna na hmô beih ma, hmô awpa nata reih awpa a sôh kaw! LAI District lâ eima za sai khiahta cha hmô thei awpa nata pahno thei awpa tlai ta hmahsiena nata asosâhna hmô thei awpa tlai ta a y. District West lâta cha sâsarina ama châ chuh, keimo hlâta ama hawhti via syulyu!

Mawrâh chhoh liata Mara District tluta Buhna doleipa nata khopathlia tloh leipa he khizaw liata ama y khao awpa chhao ta pangiasa a chhieh vei. Hezy chhao he ahyzy maoh maw tahpa a châ khiahtala, eima râh liata ryureituhpazy nata eima District Council ryureina liata pyly eima za tla heih tyh.

MADC ta hlao la awpa ama hnei khao leina daihti lia maihta Mara sawzy atuchaphie pi ta, bua pi ta eima rie thei tyh ta, siku hawhti hneipazy chata phaohrina châ ta. Monthly Fee pie n'awpa daihti liata hlao ama vaw la khao leina thâlâ ta cha ama siku tawhta Warning vaw pie ei ta, siku tawhta papua awpazy, Exam thei lei awpazy ta bie sakâ ama vaw pie tyh.

Sawhkhâ raihriapzy châta la rairuna ama hnei lei thei ngyu ma, sawhkhâ raihriana hnei leipa chhohkha pakhazie leichâ ma cha ahluk via eima châ ngâthlâh. He nawhnazy, sawhkhâ raihriana hnei leipa châna heta eimâ pahniehna, âhnalahsipa zuahpa ta sawzy chyhpa, ama hneina ama theina zydua papuapa ta, mathlai thisaih lona chôta ama hriana hlao chyhpa tazy cha ama sawzy siku pakiahsa tyhpazy chhao ta eima District Council he eimâ pahniehna chaipa a châpa vâta hlao ama la khao leina thâlâ ta cha, cha zydua chata yzie hnei thei khao tyh veih.

Atahmâ nota eima râh biehneituhpazy chhao he nohro daihti liata cha SEI ta ama yna daihti tlô aw vei tahpa reih thei'pa châ vei. Ryureina dopa eima hnei thei n'awpa heta Mara sawzy heta kheihta ma hmah eima la sualua vâ tly? Mara sawzy eima râh liata eima leidia ngâkaw he zaw.

Eima District biehneituhpazy ta Direct Finance thata buakhei tyh ei ta. Yzie hnei vei. Israel sawzy, ama râh liata cheingei pho hropa sei liata amâ tâhna daihti liata cha ei hluhpi a ngiapachhi ei ta, Khazohpa hnohta ei hluhpi ngiahthaina a haw ei ta, Khazohpa ta amâ hawnazy hlaopatloh heih tyh ta, daihti rei ama sie hlâta Khazohpa aheihesai heih tyh ei ta. Achhâna liata Khazohpa hiehâhna ama chô liata a vaw tlôna daihti liata cha "*cha pachha papua khao aw v'ei na, nama khokhiah namâ chhyapa nothlah khazohpazy chata cha pachha papua la vâ ei*" tahpa ta â chhy ei.

Châhrasala, Khazohpa Israel sawzy cha a kyhpachâna dia beih leipa ta khâ chhitha lymâ ta. Israel sawzy SEI liata ama yna daihti liata palôhru hmeiseihpa ta thlah ama chhâna daihti liata cha Khazohpa ta vaw dytha thei khao vei, ama moleina zydua ropa ta, ryureina

dopa nata a pathaih kawpa ta ryu ama vaw reih tawhna chata seichâna tawhta a pachha papua heih ei tahpa eima biehrâi liata eima hmô.

Eima District Council heta a pathaih kawpa nata âdo kawpa ta ryu a reih ma? Motor thiehpâ chalei n'awpa sôh vyuhpa ta Mara hmahsiena nata Mararâh taopathina châta sôh ama hmâh ti ta, Mara District Council chhôn liata chhithatuhpazy nata Staff thokhazy ta Mara reih cheih khoh leipa ta Maw reih a PAI PAI kawna chôta, a pamawsa kawpa ta Mara reih ama zakhei khao lei ti ta, ryureina hmiakô liata â do kawpa ta amâ duah ti ta cha –

Cha daihti liana chata Mararâh he taopathipa ta vaw châ aw ta. Khazohpa ta eima râh chicheipazy byhnâ pie aw ta. Cha tina chata eima râh he pabohsapa ta a vaw y aw. Atahmâ no duahmo liata cha Mararâh puasaipa ta Burma râh lâ a paih syulyu h'awpa khonazy eima vaw hnei tyh. Anodeikuala, chahawhpazy cha hmopha chaipa châ tlôh va! Eima râh puasaipa ta su hrolâ y hr'ei sih la, Refugee châ aw pi ta. Eima râh liata viahnazy eima mohnaona dâh hawh heta maniah mohnao hra tlôh aw ei ta, cha cha ahyhmah ta eima kho nahta pangiasa a chhieh vei. Chavâta eima râh, MARALAND liana heta eima luh pabu aw pi ta, MARALAND liana heta eima mâty pyly awpa â ngiah.

Eima râh, MADC nata ECM Hqrs. liata ryureina dopa nata chi nata chi a panano paeihna a vaw chhâ ti ta cha Mararâh ano khota a vaw cheihchalo cheingei aw tahpa he ei hnabeiseihna dâh a châ. Cha hawhta châ leipa ta atahmâ hawhta eima sie lymâ khihtala eima hmiata liata Look East Policy hlao vaw tloh aw ta, he hlâ heta Mara sawzy he tlybaipa ta y aw pi ta, tla pahnai via lyma aw pi ta, eima râh liana heta a papiparysa kawpa ta Chi hropazy pheipazah liata eimâ naoh aw.

Atahmâ he hawh mâh vei, a taopathi n'awpa ta daihti eima hnei hluh kaw chy. Mara sawzy eima leidia pathlah hlâna heta, Mara sawzy eima râh liata sei raopakyna bâ liata eimâ tâh hlâna heta, eima râh biehnaituhpazy nata ryureihtuhpazy he ahra bâ ei suh u, atahmâ he daihti rypaohpa nata pachhana daihti cha a châ.

“Mara râh kyh na pachâ hmeiseih khihta nata Mararâh a leidia awpa na pasaih vei khihta la â do kawpa ta ryureih bâ la. Maraland ta a cha awna ao he pahnolei a pachâ khao khâ. Na râh châta khâpa e na tao hra aw?”

Nama ochhôn liata khâpa reih nama hmâh tly?

~ J.B. Khaisia



Nohto thâthibuzy, hâta to thâthibuzy, thlato thâthibuzy nata nohto thâthiphia zy eima reih hluh kaw sai. A rohta arohtuhpazy chhao eima pôh via lymâ hra. Eima reih apasâhsapa nata a reihtuhpa chhao eima pôh via lymâ hrâpa ta pahno na ta, aly âchhiehpa dei châ leipa ta, thlalôh âchhieh kawpa ta ei pahno.

Anodeikua Mara reih pasô kaw tlôh ta a pasâhsa kawpazy pi heta, keimo nata eima chhônkhâ liata eima reih âdo kawpa ta eima hmâh tlai ma tahpa he a peimawh kawpa ta ei

pahno. Nochhi Mara reipâmâ leipa ta Notla Mararâh chhoh liata chi a y chhohpazy pi heta a phapa ta eima pachâ'pa a byuhpa ta ei pahno. Pamosana ta, Châkheipa chyhsa ta Tipâ (V) liata ma, Lôlei liata ma a pahrâ chhohtha ama ochhoh khaoh liata khâpa reihma ama hmâh tly i? Puhpa Laldenga (L) Ex- Chief Minister, Mizoram sawnahzy kha Mongyuh râh liata pih ei ta, chahleikhô ta mongyuh siku lia saita achu heih ei ta, châhrasala ama nô nata paw chhitha phana vâa Maw reih adita hmahta pathlaopadi leipa ta ama thai kawpa a châ. Pasâhsa amâ chhieh hra tlaih my..!

Keima mopakha ta alaichadai tyh na ta Marapa chizy hryta ei pasâhsa chaipa cha Hawthai pa chi he ama châ. Hawthai reih he a chhie tlyma, a pha tlyma zakhei rairai leipa ta khataih lia rai, khatino raita, mawpa nata viahpa kaohpazy lia tah leipa ta Marapa sawzy hry liata cha reih hropa cheih hraoh leipa ta ama reihta cheingei acheihnao lymâpa châ ei ta, mopâtlâh ama châpa hleikhô ta ama reih âboh chaipa a châpa ta ei pahno.

Marapa chi hropa ta Hawthai pa chi atlupa eima sôh kawpa ta ei pahno. Hawthai pa chi deikua la ama Politician zy, ama Pastor zy, ama Officer zy chhao rai châei sala, ama reih do kawpa saita cheih ei ta, chi so chaipa ama châpa ta rao na ta ei reithai kaw ei cha maw!

Marapa chi hropazy pi he cha a chita reithai ngâ awpa eima ypa ta pahno leipa na ta, akhieh ta deikua pasâhsa achhihpa nata ei reithai kawpa khihzy cha Saikao, Siaha Meisavaih, Siaha Vaihpi, Amôbyuh 'B', Tisôpi, Tôkalô, Palâ Mawhro nata Chheihluzy he ama châ. He khih moh ei vaw palâsapazy he cha reithai tlâh châ ei ta, pasâhsa chhao amâ chhieh tlai hrâpa ta ei pahno. He liata ei vaw reipâleipa sahlao he cha, pahlaopahlipâpa ta reih a cheihpa viarô eima châpa ta pahno na ta, a pei tahpa hleikhô ta palôhpasa âchhieh kaw bao!

Tahmâcha Mara sawzy hry liata Mara reih a veipa nata a pasâhsapa pôh via lymâ pi ta aly âchhiehpa hleikhô ta thlalôh âchhieh kawpa ta ei pahno. Pakah ta eima reih hluhpa nata eima châpaw (Article) eima roh hluhpa pachâta eima hro nata hmotaopa deikua reihtlâh châ mâh vei tahpa deikua a sia. Reih he cha pakah ta reipa nata ropa rakha liata achhâna châ leipa ta, a tao tlaita taopa chi châ ta, eima hro nata hmotaopa tlaita palâsa awpa a byuhpa a châ

Tanoh tawhta la, reihpâ tlai hr'aw si, rohluh tlai hr'aw sih la, pakah cheingei ta hmâh hluh achhuah awpa a peimawh kaw aw. Eima pakah ta mohropa pachu he cha rutu bao vei. Mara sawpi he cha reihthai, rohthai kaw sai taraw pi tan a, eima hro nata hmotaopa he mâh maw hmô'pa nata pahno'pa y lalih vei maw. Chavâta eima reih cheih zakhei khiah ma tah ngâpa ta, chi hro, pho hropa reih chei apaohpazy he nohkhih leipa châna ta ei rao cha maw! Eima reih he chi hro, pho hropazy pathaisa tlao eimâchhuah hri awpa a châ. Keimo py chhithatuhpazy pi ta la keimo nata eima chiheihzy châna a pachâ ta, keimo tawhta padona ri hmâhpathao tua ta, mohropazy eima pachu tyh awpa a pha chaipa ta ei pahno. Keimo apachâ leipa ta mohropa eima pachu thlâh ha khiahta la cha-ia nôsaw apachupa eima lyu tlamaw aw tahpa chi âchhieh kaw. Chavâta bierei kahthlâ kyh liata eima bietô alai tlamaw aw tahpa ngiaroh âchhieh kawpa a châ.

Chavâta reih he chi nata pho paduana hmobaoh peimawh chaipa a châ vâta chi hro, phgo hropa reih ta padisapa ta eima châ tlamaw lei n'awpa ta pabohsa ta palaiseihsa achhuah lymâ suh vy.

LUH TA MIAH TAO MAH Y

By- H.V. Beihalua,
Pala / N. Colony - IV

Hy Chôkhazoh, Atotaothei,
Na kyhpachâpa Marasawzy,

Eima chi-pho, reih, ti nah rãhzy,
 A eihhrãh tlai miah na pie vã ly ngaita pi;
 Eima Chi-pho chãna ualua hawh
 Hmah siepa ta, laiseih n'awpa lia,
 Pakhãtuhpa riah hluphi ta
 Eima hmia-hnõh, chavei-chachãh
 -miah dõh hr'eisa,
 Cha nah zydua tiah khaipa ta,
 Hmahsiena lâthlõh achhih thei n'awpa,
 Manõh hluphi maniah pie la,
 Eima ku-pheizy tha patlõ la,
 Eima pahno-sonazy papõhsa la,
 Chhihtuh phapa maniah pie la,
 Zawpi phapa chã awpa ta maniah bao la,
 Põhkha lõhpi miah paphaosa la,
 Tiama, ngãchhih, riahpha, adona lõhpi nah
 Chariah chaihhrãi pakipa ta miah tobi la,
 Luh ta miah tao ma y.
 Chhãna taih! Chhãna taih! Chhãna taih!

**NO. MADC.1/END/M/2015-
 MARA AUTONOMOUS DISTRICT COUNCIL
 SCHOOL EDUCATION DEPARTMENT, SIAHA**

Siaha, the 27th March, 2017

NOTIFICATION

NO. MADC.1/END/M/2015-of 24.03.2014: As provided by sub-section (7) of Section 8 of the Mara Autonomous District Council (Establishment and Management of Elementary Schools) Regulation, 2014 the Executive Committee of the Mara Autonomous District Council is pleased to determine and fix fees structure of Private Schools/Institution established within Mara Autonomous District as mentioned below:-

S/No	Class wise Category	Admission fee	Monthly fee	Hostel	
				Admission	Monthly fee
1	Kg – I - Kg-II	Not exceeding Rs. 1000/-	Not exceeding Rs. 450/-	Not exceeding Rs. 2000/-	Not exceeding Rs. 4000/-
2	CL-I – CL – IV	Not exceeding Rs. 2000/-	Not exceeding Rs. 500/-	Above Hostel admission fee and monthly fee are for all Classes	
3	CL-V – CL – VIII	Not exceeding Rs. 2500/-	Not exceeding Rs. 600/-		

Further, it is hereby ordered that no existing fees of any item (which are already submitted to this Office) should be raised/increased without prior obtaining permission of the authority.

This order will take effect from the date of its issue.

(K. VANLALLIANA)
District Council Education
Officer
Mara Autonomous District
Council
Siaha

**Memo. NO. MADC.1/END/M/2015- /
2017**

Siaha, the 27th March,

Copy to:

1. All Principals of Private Schools within MADC area for information and Compliance.
2. The Secretary BSE, MADC Siaha for information.
3. District Project Co-ordinator, SSA Mission, Siaha for information.
4. The President, MSO (Hqrs) Siaha for information.
5. All CEOs for information.
6. Guard file.

District Council Education
Officer
Mara Autonomous District
Council
Siaha